


V
9696



Vg
696



Endschuldigung

D. Andres Carlstads des
falschen namens der auff-
rür / so yhm ist mit
vnrecht auffges-
legt.

Mit eyner vor-

rhede Doct. Martini
Luthers.

Wittenberg.

1525.

BIBLIOTHECA
PONICKAVIANA

UNIVERSITÄTS-BIBLIOTHEK
HALLE
(SALE)

Allen lieben Christen für

die diese schrift kompt / Gnad vnd fride von Gott vnserm vater vnd herrn Ihesu Christo .

Es hat mir D. Andreas Carlstad eyn büchlin zugefertigt / darinnen er sich entschuldigt des ferlichen vñ schweren gerüchts / als solt er schuldig seyn an dem auffrur / odder eyn herobst vnd anreger der auffrürischen gewesen seyn / Vnd mich mit grossen ernst gebeten / das ich das selbige wolte lassen durch den druck ausgehen / zurretunge seynes namens / vnd auch / das er nicht so iemerlich vnuerhort vnd vnüberzeugt / verurteylet / vnd on verdienst vnd ursach / seyns leybs vnd guts vnicher seyn muste / nach dem izt das geschrey geht / als solt man mit vielen armen leuten zugeschwinde faren / vnd aus lauter zorn dahyn richten beyde schuldige vnd vnschuldige / vnuerhorter vnd vnüberwundener sache / als ich denn wol besorge / das die zaghaftigen tyrannen / die sich vorhyn für eyn-rauffschenden blat fürchten / izt als zu künne worden seyen / bis sie yhren muttwillen voln bringen / das sie Got auch zu seyner zeyt stürze zu boden.

Wie wol aber Doctor Carlstad meyn höchster feynd ist der lere halben / vnd darüber wyr beyde so hart aneynander gesetzt haben / das keyne hoffnung da ist blieben / eyniges vertrags odder ferner gemeynschafft / doch weyl er ym seynem anligen vnd anfechtunge sich solcher trewe zu myr verseyhet / mehr auch denn zu seynen freunden / die yhn auff mich gehezt haben / wil ich yhn die selbige trewe bey myr finden lassen / so viel myr möglich ist / vnd yhm den dienst vnd andere mehr gerne erzeygen / angesehen / das vns Christus also leret vnd mit eygenem exempel geweyset hat / vnsern feynden wolzuthun vnd zu lieben / dem wyr schuldig sind nachzufolgen / so wyr wollen Christen seyn vnd mit yhm teylhaben ym seynem reych . Wüste auch meyn gewissen für Gott nicht wol zuerhalten / wo ich sehe / das yhm vnschuldige



lich fahr leybs vnd gutes entstunde/ vnd ichs künde helffen
ffren weren/ vnd thets nicht / Es würde myr freylich für
Gott so viel gelten / als thett ich selbs so vbel an yhm/
so doch auch S. Paulus leret Ro. 12. Hungert deynen
feynd/so speyse yhn/dürstet yhn/so trencke yhn 2c.

Vnd thu das auch so viel deste lieber/ das ich hoffe/
es solle Gott gnade geben (so wyr ernstlich bitten) das
diesem guten anfang noch bessers folge / vnd er sich zu
letzt erkenne / vnd von seynem yrthum ym Sacrament
falle vnd zur rechter warheyt sampt vielen andern wid
der kome/Denn Christus spricht/der tag hat zwelff stun
den/Es ist auch an keynem menschen/weyl er lebt/ zuier
zweyffeln/wie hoch vnd tieff er ymer gefallen ist / Vnd
wyr wissen / das Gott wunderbarlich ist ym seynem
wercken/wilchen wyr / widder zeyt noch weyle / widder
mas noch ziel / widder farbe noch gestalt geben vñnnen.
Denn das wil ich hiemit gar frey offentlich haben bes
dinget vnd bekennet/ das ich mit diesem meynem dienst/
D. Carlstads meynunge vnd lere / sonderlich vom Sa
crament/gar nichts bekrefftige noch derselbigen eyniger
ley weyse zufalle / sondern wie ich zuvor da widder ges
schrieben/ also stehe vnd bleybe ich noch/bitte auch yder
man auff's aller trewlichst wolte sich für der selbigen
hüeten / vnangesehen das viel andere auch dauon der
gleychen schreyben/ aber so mit vngegründten / ersuchten
rencken/das ich den selbigen keynen andern danck weys/
denn das sie mich ym meynem verstand nur deste stär
cker machen.

Ob aber yemand so vol argwans sticket / vnd mich
wolt verdencfen/das ich D. Carlstad alzubald glenbe/
vnd möchte nit seyn ernst seyn/sondern wol anders ym
synn haben / Da antwortte ich / Es wil widder myr
noch yemand gebürn/ cyns andern hertz zu richten / So
spricht Paulus 1. Cor. 13. Die liebe ist nicht argwenig.
Vnd abermal/ Die liebe trawet alles. Ob sie nu gleych
offt betrogen wird vber solchen trawen/ wie man spria
cht/Traw reyrt das pferd weg/so leßt sie doch nicht abe.

So sage ich nunmeyne meynunge/ so lange D. Carlstad
sich zu recht erbeit / vnd leyden wil was er leyden soll/
wo er auffrührisch erfunden vnd überwunden wird / so
lange mus ich seynem büchlin vnd bekennen / glawoben
geben/wie wol ich selbs vorhyn/ehe ich solch seyn theror
hoch erbiten höret/ bewegt war / das er eynen auffrühris
schen mut hette / wie etliche/die bey yhm waren. Aber
nu mus ich seynem eygen erbiten rawm lassen/vnd vera
hörunge nicht helffen wegern/sondern foddern.

Denn wo man die warheyt sagen soll/ vnd die sache
eben bey dem liecht ansehen wil/so ist dieser iamer vnd auff
rur nicht alleyn der Parwn/sondern viel mehr der tollern
fürsten vnd törichten bisschoffen schuld / Denn da der
gemeyne man rechtschaffne prediger hatte vnd das reyne
Euangelion gerne hörete/ darinnen sie glawoben vnd ge
horsam lernten / das kundten vnser iunckern nicht ley
den / veragten on alle vrsach die frumen prediger / vnd
setzten vber das volck/große eselköpffe/die nichts kund
ten / vnd hetzen das volck mutwilliglich widder sich/
Darumb schaffts Gott/das auffrührische prediger vnter
das volck kamen vnd fiengen solchen iamer an / da
durch nu solcher vnwillen vnter den gemeynen man ko
men ist/das freylich keyn auff hören seyn wird / bis die
tyrannen auch ym dreck auffstehen/ Denn es keynen bes
stand haben mag / wo eyn volck seynen herrn nicht lie
bet/sondern alleine fürchten mus/vnd geschicht wie yhe
ner sagt / Wilchen viel fürchten / der mus widderumb
viel fürchten/ Denn er kan nichtsicher noch frölich seyn/
bey denen/die nicht lust noch liebe zu yhm haben.

Doch vnser iunckern vnd gotzen sollen solchs nicht
horen noch annemen/sondern zufaren/ vnd dem Euan
gelio schuld geben / was sie verdienen / vnd der narren
reymen dierweyl führen/der da heyst/ Ich acht seyn nicht/
biss das eyner kome/der eynen andern reymen dawidder
füret vnd spreche / Es ist meyn ernst / das widder fürst
noch bisschoff vnter dem hymel bleybe. Drum las nur
faren / was da feret / sie werdens bald finden / was sie

lengst gesucht haben/ Es ist schon auff der ban / Gott
gebe/ das sie sich ynn der zeyt bekeren / Amen .

So bitte ich nu beyde herrn vnd yederm an / weyl D.
Carlstad sich des auffrürischen namens zu entschuldigen
so hoch erbeit/das man yhn lasse dazu komen/auff
das Gott nicht weytter vnd höher versucht werde/Dazu
vnlust vnd groll des possels widder die oberkeyt nicht
stercker werde/vñ grössers rechts scheyn gewynne/ Denn
es ia nicht gut ist / das gemeyne gebet vnd geschrey auff
sich zuladē/ Syntemal der nicht liegen kan/der verheys-
sen hat / Er wolle der verdrukten schreyen horen vnd
nicht leyden / Er hat auch gewalt gnug / solchs zu
rechen vnd zustraffen. Gott gebe vns seyn gnade . Amen.

Allen lieben Christen sey

gnad vnd frid von Gott dem vater vnd von
vnserm herrn Ihesu Christo .

Liebe herrn vnd freunde / mir kumpt aus gemeynen rede/
auch aus schriften für / das ich des Alstettischen auff-
ruers vnd der andern viel berüchtigt werd / als solt ich
der auffrürischen paroren herobdman vnd herfürer ge-
west seyn/das myr vnd meynen lere vnd dienst/ vnd dem
namen Christi zu vernichtung gereycht.

Derhalben weckt mich meyn gewissen auff / vnd
treibt mich/meyn vnschuld ann tag zulegen/Damit ich
widderumb ynn eyn besser geschrey durch disse warhaff-
tige anzeyg/kom / Vnd der namen Christi nicht vmb
meynet willen verlestert werd/vnd eyn iglicher/ der redli-
keyt / vnschuld vnd gerechtigkeit liebet / odder Gottes
rach fürchtet/ sich an myr / des auffrurs halben / nicht
mehr mit worten odder wercken vergreyff.

Das ich ynn eyn solichs gerücht gekommen / macht
anfenglich / das ich lewotte gehauffet hab / vmb des
besten willē/auff das ich ersür was dahinden wehr/von

welchen ich nicht gemerckt/das sie willens weren/auff-
zur zu erwecken / Die doch bey etlichen/ als auffrührisch
verdacht werden.

Zu dem andern/fürcht ich/das der erwidig achtpar
vnd hochgelert D. M. Luther / nicht wenig an myr
schuldig sey. Der mich für eynen rotten geyst vnd auff-
rührer ynn die welt öffentlich geschrieben / vnd mich des
Münzers gesellen schuld / Vnd das alles mit solchen
mechtigen Worten/vnd wolgestellter red/ das die eynfela-
digen nicht anders gleroben / denn das ich an dem
Münzerischem auffzur schuld hab / Daraus gekom-
men/das eyn nachpur dem andern vber die gassen mich
als eynen auffrührer/zugeruffen hat.

Zu dem dritten / hat mich die grosse fahr vnd vners-
tregliche verfolgung / der halben ich viel vnd heymlich
yningesessen vnd nicht gesehn byn/tieffer ynn den sumpff
des grevlichen geschreyhs gestossen. Denn dierweyl ich
nicht byn zu sehen gewesen / hat meniglicher glerobt / ich
sey an dem ende gewesen/do mich die vnchristliche schwe-
zer byn gelogen haben.

tu wiewol ich weys/das myrs gewalddiglich vnd
mit vnrecht wird auffgelegt. Idoch bitt ich Gott/er
wols yhnen vergeben. Die aber behafften wollen auff
yhem grym/die straff Gott/des die rach ist.

Von dem vnchristlichen gemüt des Münzers/mag
ich für Gott mit gutem gewissen schreiben/das myr des
Münzers furnemen / als ichs gewisslich verstund / so
widder/vnd so hertzlich leyd ist gewesen/als eynem der do
lebet /er heys wie er wil / Vnd das ich dem Münzer
meynes vermögens gerocht hab / beruff mich auff
die yhene / die noch zubekommen synd / so die farb meyn-
nes angesichtes gesehen vnd die hastikeyt meynere rede
vnd clag widder des Münzers schreyben angehört ha-
ben. Wie ich des Münzers torheyt verfluchen vnd ver-
melden thet / was vnrathes draus ervolgen / Das viel
vnschuldige beschedigt / Etliche vmbß leben kommen.
Vnd dem Euangelio eyn vnerstatlicher schad begegnet

wurd 2c. Das ist alles (Gott clag ich) war worden / vnd alles gerad ergangen / als ichs weysgesagt. Was ich auch fürchte / das hat mich umbgriffen. Denn ich vnschuldiger werd verdacht vnd beschuldigt / vnd mus des Muntzerischen auffrurs viel entgelten / des ich meyn lebenlang noch nie gefallens gehabt / noch teylhafftig seyn hab begert. Das aber mus ich nu Gote lassen walden / der mich vileycht meynen sunden halben / so wol ym dem bade des trübsals weschet / das ich schyr meyn leben ausblas.

Das aber ich den Muntzerischen auffrur hab helfen weren vnd verhyndern / das kan ich mit den zu Orlamünde bezeugen / Wilche dem Muntzer / der an die gemeine zu Orlamünde vmb zufal vnd anhanck schreib / widderumb ein antwort zuschickten / die Christlich vnd vnstresslich war / vnd den Muntzer mit gottlichen sprüchen / auß der heyligen schrift gezogen / hefftiglich abhielten / vnd vleissig warneten / Er solt mit Gottis wort fechten vnd nicht mit eysern schwerden. Zu dem selben briff gab ich auch ungeferlich ein zeil oder zwo / vñ halff des Muntzers feror gleich dempffen vnd leschen / als die zu Orlamünde.

In dem selben briff wird man one müh finden / ob mir die vermessene anmüttung des Muntzers gefellig oder verdrisslich sey gewesen. Es ist auch soliche antwort wol zu bekommen / Den der Orlamündisch briff ist zu Wittenberg vorn iar abgedruckt / vnd in Teutscher nation nicht unbekandt / drum ist es alles vnleugbar was drinnen geschriben. Vnd auß der selben antwort solten mich alle verstendige / erbare / vnd liebhaber beyde der gerechtigkeit vnd vnschuld billich vrteilen / vnd endt schuldigen oder beschuldigen.

Das ist auch war / das Muntzer neben dem brieffe / wilchen er zu obgedachter gemein schrieb / mir auch hat geschriben / vnd mir ein gleiche oder grossere torheit an gemüt hat / Aber als bald ich des Muntzers briff las / do erkalt mir mein geblüt / in dem lesen / vnd ich erschraek so

übel/das ich vnbesonnen den selbigen briff/ vor groſſam
erschrecken/in etliche stücke/von oben heraber zureyſe.
Zernach aber bedachte ich/das ich solichen briffe/auffs
minste einem solt gezeigt haben/damit doch irgent eyner
wissen trüg/wilche torheit mir der Muntzer annütten
dorfft/ vnd wie leichtfertig vñ vnwitzig mich der Mun-
tzer achtet / Nemblich fur einen solichen / der yhm zu so-
licher vnſynnigkeit dorfft helfen.

Derhalben ſezet ich mich bald auff ein pferdlein/ vnd
eylet gen Zellingen zu Magistro Bonifacio / Beclage
mich des Muntzerischen briffs / solicher vnchristlicher
annützung/böſes argwoans/vernichtung meiner per-
ſon/vnd verleromung meynes lebens. Des alles mich
der Muntzer solt vberhebt haben. Darauff fugten wir
die stück des briffs / auff eynem tisch zusammen/ vnd als
wir des Muntzers brieff gelasen / da ward obgenanter
Bonifacius ye so vngeduldig vnd zornig widder den
Muntzer als ich/ Ferner verzeelt ich wie der Muntzer der
gemein auch geschriben/vnd keret schnell vmb gen Orla-
münd / vnd traff etliche an / vnd sprach/ sie solten sich
mit scharffen schrifften wappen/ vnd dem tropfen mit
der scherff antwortten/das gescheen ist/als oben ist ver-
meldt.

Fur mich aber schreyß ich dem Muntzer ein latinis-
che antwort / vnd wolt das iderman wiſſet was ich
geschriben vnd meinen briff yn henden hett/ mein schuld
oder vnſchuld drauß zu erkennen/hoff ich hab der selben
antwort ein copyen zu Orlamunde.

Summa/ ich weis mich des Muntzerischen auff-
ruff vnſchuldig vnd vnteilhaftig/beruff mich auff so-
liche obberürte briffe / welche von der gemein zu Orla-
munde vnd von mir dem Muntzer zur antwort geschri-
eft. Beruff mich auff die zu Orlamunde / vnd auff alle
die iene/den mein wandel die selbe zeit vnd auch darvor
bekant ist gewest.

Ist aber ymand der anders ſagen darff oder wil/der
wiſſe eben/das ichs rechte nicht flih/ sondern bereit bin/
mit yhm/

mit yhm/ für ein scharff gericht zudretten / wo ich nur
für gewald geleydt vnd versichert bin/ was recht ist zu
leyden. Wo aber der clager sein clag nicht / wie recht ist/
aufführen wurd/ das er das leyden soll / was ich leyden
müß / so er seine clag nach ordnung des rechts hin-
aus gefüret hette.

Ich schreib disse endschuldigung vngern nach des
Nuntzers todt/ wolt auch den Nuntzer lieber zu vil lo-
ben/ den mit warheit ein klein wenig schelten/ Mich aber
dringt not/warheit zuschreiben/ vnd zweiffel nicht / das
mich Nuntzer/ wenn er noch lebte/ endschuldigen müß/
vnd bin ungezweiffelt ist er ordenlich gefraget / das er
mich entschuldigt hab.

Der ander Bawren halben in der Rottenburgischen
Landwehr vnd in dem Francken land/erbite ich mich zu
volkömmlicher entschuldigung/ vñ solche anzeig zuthun/
meyner herberigen/ gesellschaft/ vnd wandels / das mich
kein verstendiger verdencen kan. Aber izt wil ich nur
kurtze anzeig geben / das man wol verstehn magt was
gnad ich bey den newen Juncfern/ bey den Bawren ges-
habt / vnd das ich yhr haroptman nicht gewesen bin/
noch dafür gut genug geacht wehr/ so ichs begert hett.

Ich bin zu Rottenburg innegeessen heymlich biß
sich die Bawren yns feld lagerten/ das kan ich erweisen/
wie ist es dan möglich das ich sie erweckt hab? Oder
wie kan es bestehn/ das ich ir furgenger vnd haroptman
anfänglich gewesen bin? Ich glewß nicht das mich ein
Bawr gewist hab / halt auch das mich nicht ober drey
Burger wisseten / was hab ich dann für gemeinschafft
mit den Bawren gehalten? Vnd ich wehr noch lenger
heymlich innegeessen/ wenn mich ein guter freund/ eyner
des rathes/ nicht hett außgefüert.

Wil ymand ligen oder sagen/ das ich die Bawren
mit briffen hab außgesprachen / lassent den selbigen die
Briff aufflegen / vnd erkennet ob si mein sind / Was be-
gert ir mehr von disem anfangt? sal ich negativā facti
anders bewerren? Macht das ein vermüttung widder
mich/ das ich nicht gesehen bin: ist disse vermüttung red-

B.

lich: oder sol solcher dandt ye gelten/so werden wedder
fursten noch herrn sich des auffrurs endladen / die auch
nicht in ydemans augen gangen sind.

Ich hoff nu/das mich niemand / des anfangs des
auffrurs werd verdencfen/der mich aber wil verdencfen/
vnd sein ehre erhalten / der sal wissen das er fur Gott vnd
bey der welt schuldig ist / seynen verdacht zu bezeugen.
Aber das gezeugnis wurd yhm sehlen vnd mangeln/
wen er samlot anrüg.

Nu wie ich den Baroren vnd den Bawrischen Bur-
gern gefallen hab/darnach als ich anßging zu liecht/ob
ich so würdig in yhren augen gewest / das sie mich zu
yhem rad oder heroptman hetten konden leyden / das
werden disse nachvolgende geschichte offebaren/der ich
nur ein teyl erzelen wil Kurtzhalben.

Ich ging eyms von Tarobarzal gen Kottenburg fur
ein herberg hin/ in wilcher vil geharnischte paroren/ mit
Buchssen vnd brennenden zachen stunden/ Auf den selben
riff einer Carlstat Carlstat/ Ich aber ging furt als hö-
ret ichs nicht/den ich fürchte mich / da volgt mir bald
einer mit einer buchssen/ vnd bracht mich zu seinen gesel-
len. Als ich zu yhm gekömen / fragt einer/ Seyt ir Bruder
so lesend des bottes briff/ Seyt yr nicht Bruder so wollen
mir euch rechtfertigen / Das redt der paror mit solchem
ernst/trotz/vn hochmüt/ dz ich froh ward/dz mirs zum
lesen gedeyhet/ Als nu mein gesell vnd ich die offene briff
durchlasen / vnd die vberschrifft der verschlossenen briffen
gelesen/liesen vns die Baworn furtgehn. Aber des
selbigen tages machten gleich die selbige Baworn (als
ich nicht anders glewß) ein gericht in der stadt / Carla-
stat bricht briff auff vnd rechtfertigt die boten. Solchen
lohn gaben mir die verzwiffelte püben / der mich keiner
bedrengt oder hieß / das ich oder mein gesell einen ver-
schlossenen briff auff brechen sollten. Wenn mich mein
weeg gesell vorm Ausschusß oder rathe nicht hett endta-
schuldigt/hetten mich soliche pauren in angst vnd nott
gebracht. Ist aber auß dem geschichte vnd aus dem
selben heroff lin der Baroren nicht zu mercken / was die

pauren von mir gehalten: Wie sie mich geliebt haben:
Sie solten mich freylich ehe in die puchssen fur ein kugell
gestickt/ dann als eynen hauptman in yhrem hauffen
gesetzt/oder gebraucht haben.

Zu Rottenburg het mich ein purischer gern ersto-
chen/ der ander gern durchrandt/ Got aber behütt mich
gnediglich.

Zwischen Würtzburg vnd Carlstat zu Tengers-
heim waren etliche pauren mit buchssen vnd anderen
weren versamlet/wider den Carlstat/vnd wolten mir vñ
meynem weib nemen/was wir noch oberig hetten/Vnd
als ich verstund waren yhr ein teyl frisch aus dem hau-
ssen gelauffen/vnd lisen sich hören/ das sie des ym hau-
ssen weren verstandigt/ das einer mit seinem weib gefaren
ken / der Carlstat hieß / dem sie nemen döchten was er
fürerte/2c. Vnd wenn ich nicht ein geleyde zu Würtzburg/
durch fürbit / meynes liebsten patron hatt erlangt /
vnd den selben Bawren gezeigt/vnd zulesen gegeben/het-
ten mich die pauren beraubt/ vnd mich vielleicht gefan-
gen/vnd meinem weib vnd cleynem kind gethan/was sie
beschlossen.

Darauff ist abermals warlich scheinlich zu mer-
cken/ wie gut ichs bey den Buren gehabt/ Das auch ich
vnter Bawren gewest bin/als ein haße/vnter den rüden.
Es merck ein iglicher was er wil so weis ich das fur
war/das mich die pauren vil mals erwurgt hetten/wenn
ich von Got nicht wer bewardt gewest.

Ich wer gern bald auß der Bawren gepite gewest/
drumb wer ich oft gern aus dem Francken land von
meyner mutter gezogen/Aber als oft ichs gegen Sachs-
sen zuversucht/als oft must ich vmbkeren.

Zu Stetten/ein halbe meyl von Carlstat hieß mich
ein paur einen briffstrager kante mich wol/vñ sagt/Lu-
ther vnd ich weren an yhnen schuldig / Aber ich brach
mich von dem selben vnd andern puren mit guten wor-
ten. Bald darnach nicht weyt von Tungen gieng ich
den steyg/von meynem weyb / da ward mein weib also
angesprengt. Wo kommest du her: Fürstu Pfaffen gut?

Darauffantwort mein weib / Es ist kein pfaffen gut/
Ich vnd die meine habens mit sawrer arbeyt erworben.
Da sprach der ander Pur/Tymbs flux hin / es ist nicht
anders dan pfaffen gut/Mein weib. Tu soll ich in mey
ner g.h.land beraubt werden/vnd bin so weyt vnderaubt
kōmen/das ist ye iamer/ Ich werd des kēgen m.g. g. ein
Klegereyn werden/Darauff ein Pur/Deß dich gots mar
ter schende / wiltu noch f.vnd h. haben? Wir wollen
alle f.vnd h. zum lande nauff iagen. Wiltu auff f.vnd
h. pūchen? Mein weib. Sollen mir nicht f.vnd h. ha
ben/was hab ich gewist? wil ich doch gern abstellen/
vnd der f. vnd h. nicht gedencen. Darauff einer / das
mocht ir thun wolt ir fūg ym lande haben/Vnd ein an
der. Ziehe das dich gots marter schendte.

Seind aber das nicht kostliche zeichen/zu beweisen
das mich die Pauren gern zum heubtman hetten ge
habt? Disse zeichen sind mir an dem ende begegnet/
do ich bekant / von welchem sie gen Carlstat zum wo
chenmarckte ziehen/Haben mir das die bekante than/als
war ist/vnd mich freylich der hauff/one gezeucknis mey
ner künde/ nicht hette angenommen / Kan abermals ein
byder man mercken/obs auch vermuthlich sein konn/das
ich der Pauren anrezer oder heroptman gewest sey.

Ich was nicht lang zu Carlstat bey meynen mutter
da pfaffte mich einer an / auff dem marckte / vnd nach
einer gehalten predig von mir/ryethe mir ein schwager/
ich solt mich etwar in ein Dorff thun/ Was sal ich sa
gen/ Als ich auff Franckfort zu reisen wolt/vnd zu Fra
mersbach meines weibes erwarten/samelten sich etlich
raber / aus den Pauren/ die mich wol kanten / auch zu
Carlstat bekant waren/ vnd rathschlugen vnd beschlos
sen/am abent Trinitatis / das sie mich im spefferwald/
an einen parwen pindten oder eroungen wolten / das
nach alles nemen was noch vberig war/bey mir vnd
meinem weyb / Aber Gott offenbart yhren rathschlag
vnd bracht mich durch einen andern weg.

Es ist nicht glewlich wie selzam mirs mit den pa
ren ergangen. Ich wil das mal aber nicht mehr von

dem gemeinen puschman anzeigen/ Den das acht ich
für gemugsam / mein vnschuld drauß zu rhümen/ so an-
ders ein verstandiger vnd redlicher vber disse exempel od-
der geschichte kumpt. Die puren haben ye nicht vnbe-
kante erwelt/odder nichts one gezeugnis der bekanten
angenommen. Welcher ist nu so fraidig/ der für gerichte
treten vnd sagen darff/ Die puren haben Carlstad zum
herbstman angenommen odder gebraucht: Wo ist der
Carlstad angenommen: wie heysen die zeugen: wel-
cher hats gesehen: wil man von vermüttung reden/so ist
ye das eyn seuberliche vermüttung/ Das die bekante den
Carlstad gern hetten berawbt vnd darzu ermordt. Will
tu nichts gleroben/ daran ligt myr nicht/ wenn ichs aber
am gut vermöcht/ich wolt das alles reychlich vnd ges-
mugsam zu recht erweysen / das ich nicht schuldig byn
zu erweysen. Das eyn ander vnerweyßt lassen mus vnd
doch schuldig ist zu bezeugen.

Zu Rottenburg hab ich viel mals ynn dem artickel
vom Sacrament gepredigt / ist eyner keck / der sag als
eyn redlicher/ das ich eyn zeyl/ ein wort/ oder eyn syllaben
zum auffzur gepredigt hab / vnd beweyß das mit vn-
uerdechtigen zeugen / die mich gehört haben / wil er an-
ders seyn man nicht lügenstraffen. Ich byn auch wid-
der ynn dem Ausschus noch ynn dem Rathe gessen.

Das ich nu bey puren geherberigt / gessen vnd trin-
cken hab/zeyten mit yhnen/ die vnbillikeyt hab helffen lo-
ben/odder die sünde zu viel vnd zu sehr gestrafft/ dem kan
ich nicht thun. Ich must essen vnd trincken haben/ vnd
war nicht schuldig das ich meyn leben / meynes weyßs
vnd meynes Kindes leben ynn ferliket stelte. Ich wehr
ye eyn narr gewesen / das ich mich widder pauren hett
auffgeleindt / von welchen ich eynes worts halben zu
stückten roer gehackt worden.

Das ich von Rottenburg zu meynen mutter gezogen/
ist die vrsach / das ich / nymer zu Rottenburg bleyben
dorffte / ferliket halben/ die ich stund / Wo aber vnd zu
wehm solt ich billicher/ denn zu meynen leyblichen mut-
ter zihen: Das ich zu Wertzburg gewesen/ ist vrsach/

das ich eynes geleydes bedrofft/ das myr auch nütz ge-
west ist.

Das sey nu verzelt von den pauren vnd von myr. Nu
von den herobtleuthen der pauren. Die pauren schickte
ten etliche herobtleuthe gen Kottenburg. Vnther wil-
chen was eyner/ der sich vber tysch rhümet/ das er den
ganzen Meyntal wegig gemacht/ der brachte so viel zu
wegen/ das eyn supplication/ ynn dem namen eyner
ganzen gemeyn zu Kottenburg/ an eynen erbarn Rath
getragen/ vnd drynnen gebetten ward/ den Karlstad
auszutreyben/ weys auch nicht anders/ den gedachter
herobtmann sey eyn anhezer vnd zuschürer gewesen/ das
mich die thorbüder/ des vorigen tages eyngelegter sup-
plication/ zwischen den thoren singen/ vnd willens wa-
ren myr villeycht den todt anzulegen. Der izt gedachte
herobtmann was ynn grossen ansehen/ vnd warlich/
wenn ich vnther den pauren gewesen wehr/ als man
mich beleugt/ Er hett verschafft/ das mich die pauren
mit püchssen vnd spyssen von sich getrieben hetten/ also
das ich nu kalt vnd fawol wehr. Wie mich der ander
herobtmann odder radtmann der pauren zu Schweyna-
furd/ auff yhren landes tag ehret/ das gedenc ich noch
wol/ aber es sey ym vergeben.

Mich nympt doch wunder was ich den pauren
vnd yhren herobtleuthen gethan/ das ich gar selten ey-
nen tag antruff/ ynn welchem ich nicht wehr ynn nott
vnd angst/ odder auff's wenigeste ynn spott gefallen.
Ich kan nicht erdencken/ wes die ursach ist/ Es wer-
dem diesse/ das ich eynen brieff zu dem hawssen schreib/
vnd sie allesampt schuldiger barmhertzigkeyt erynnert/
vnd vermante/ das sie sich für Gottes zorn fürsehen sol-
ten/ zeygt yhnen etliche historien von dem Assur Nabu-
chodonosor/ Moab an 2c. mit kurzer vermeldung/ das
Gott der herr soliche leuthe aufferweckt hat zur straff
seynes volcks/ vnd das Got alle soliche leuthe dennocht
hat erwürgt/ alleyn derhalben/ das sie zu viel tetten/ 2c.
mit andern vnd kürzern wortten/ Vnd ich machte war-
lich/ meynen brieff also süß/ das ich besorget/ Ich mös

icht bey dem andern teyll ynn vngnad fallen. Aber ich
wagtees den pauren vnd herrn zu gut / Den selben brieff
hat eyn radman der pauren / welcher myr namhaftig
ist gemacht / vnthergedruckt / vnd ym heer hauffen ge-
sagt / Karlstad ist nicht gut peurisch / der selb radman
hat auch mich vnd alle meyne gñnder / wo er eynen ersah
gepubet vnd Karlstatisch puben gescholten. Das
mag auch villeycht die vrsach seyn / das mich die pau-
ren vnd yhr herobtleuthe vervolgtten / Jdoch weyss ichs
nicht fur war / Das weyss aber ich wol / das ich bey dem
herrn vnd pauren bösen wind gehabt / die geystlich herrn
tagten mich als wilpredt / vnd die puren ergriffen mich
vnd hetten mich gefressen wen ich vnbehütt wer gewesen
von Gott. Vnd ist dennoch keyner / der mich zu weisen
vnterstanden hat. Also achten sie beyde Bischoffen vnd
puren / das kostlich gleichnis Christi / dem sie folgen /
vnd vmb eines irrigen schaffs willen. 99. in der wust-
nus lassen solten.

Ich hoff f. vnd hern werden disse anzeig zu hertzen
nemen / vnd mich aus dem verdacht lassen / vnd wo sie
zu kurz / erbiet ich mich zu recht vnd vorhor / vnd einzus-
legen den ganzen rayhen der herberigen / meynes wans-
dels vnd reden zu geben / so viel ich ym gedechtnus noch
halt / hoffe aber mich werd disse vermeldung vnd erbie-
tung helffen vnd schutzen.

Sal aber nichts helffen / so frew ich mich meynen
vnschuld / vñ rhüme mich der selben / vnd weis das mein
Got auch ein gericht hegen vnd halten wird / ynn wel-
chen myr f. h. burger vnd pawren antworten / vnd
das empfangen müssen / was sie an myr verdienen. Das
red ich nicht das ich one sund sey / denn so ich sundige /
wenn ich wol thun fur Gott. Ist keyn wunder das
ich gesündigt hab vnter den pauren mit ferlichkeiten vmb
geben / Aber disse sund steht nicht ynn dem gericht der
welt / sondern ynn der vergebung Gottis / der vns allen
uell gnedig seyn. Amen. Dat. Joannes Baptiste.
Anno xxv. Andreas Carlstad.


79096 21

Faint, mostly illegible text in a Gothic script, likely bleed-through from the reverse side of the page. The text is arranged in several paragraphs.

M.C



X 2207065



Vg
696

3, 8



Endschuldigung

D. Andres Carlstads des
falschen namens der auff
rür / so yhm ist mit
vnrecht auffges
legt.

Mit eyner vor

rhebe Doct. Martini
Luthers.

Wittenberg.

1525.

BIBLIOTHECA
PONICKAVIANA

UNIVERSITÄTS-BIBLIOTHEK
HALLE
(SALE)